

## Txoj Kev Ua kom Koj cov Khib Nyiab Tsawg Zuj Zus dhau los ntwam txoj Kev Rov Qab Siv (Reusing) Tej Khoom

Yeej muaj ntau txoj kev ua kom koj cov khib nyiab tsawg zuj zus mus. Qhov zoo dua yog tsis txhob tsim khib nyiab ua ntej tshaj plaws, kom thiaj tsis muaj dab tsi uas yuav tsum muab pov tseg.



Tsuas yog yuav tej yam uas koj xav tau xwb. Yog tias muaj tej yam uas koj yuav siv ib los sis ob zaug xwb, koj mus xaub los sis mus qiv tej yam no ntwam koj cov phooj ywg. Koj kuj yuav tau tej yam khoom qub zog uas lwm tus neeg twb siv lawm thiab. Yog tias koj yuav tej yam khoom qub thiab yuav khoom ntwam tej qho chaw muag khoom qub, ces twb yog koj pab lwm tus neeg ua kom lawv cov khib nyiab tsawg zog vim koj rov qab siv tej yam ntawd rau koj tus kheej.




Ib qho zoo heev yog muab tej khoom uas koj tsis siv lawm pub rau lwm tus neeg kom lawv thiaj li siv tau. Tej khoom uas siv hauv tsev uas tseem zoo, tej ris tsho, tej khoom ua si, thiab lwm yam khoom koj muab pub tau rau tej koom haum uas pab tib neeg, tej koom haum no yeej tsis tsam paj li. Ib txhia taj laj muag khoom qub xws li Salvation Army thiab Disabled Veterans yeej kam tuaj ntwam koj lub tsev tuaj nqa tej yam khoom uas koj xav muab pub rau lawv. Yog tias koj tsis paub tseeb saib ib lub taj laj muag khoom qub puas yuav txais ib yam khoom uas koj muaj, cia li hu mus noog lawv.



Koj muab tej yam khoom qub uas koj muaj los muag los tau thiab, qhov no lus Mis Kas hu ua garage sale. Koj yuav tsum npaj tej khoom qub uas koj xav muag no, tiv nqi rau txhua qhov khoom, thiab tiv paib hauv koj koog zej zog kom cov neeg thiaj yuav pom qab tuaj nrhiav tau koj lub tsev. Ib txhia neeg them nyiaj tso ntwav khu xab nas txog lawv txoj kev muag khoom qub no hauv daim ntwav xov xwm hauv zos. Cov nyiaj uas koj tau los ntwam txoj kev muag khoom qub no yeej yuav pab tau koj thiab.



Tej taj laj muag khoom consignment kam txais tej khoom uas tseem zoo heev thiab pab muag tej khoom ntawd rau koj. Tej khoom no yuav muab teeb tseg zoo li hauv ib lub taj laj muag khoom department store. Ib txhia taj laj muag khoom consignment tsuas yog muag ris tsho thiab rooj tog rau cov me nyuam yaus, los sis ris tsho thiab hlua caj dab hlua tes thiab qhws ntsej rau cov poj niam, los sis khoom kis las, los sis khoom kom tes taw, los sis tej nkauj mloog, los sis rooj tog xwb. Cia li hu ib lub taj laj thiab noog saib lawv puas kam txais koj cov khoom qub thiab pab muag rau koj.



Yog tias koj muaj ib qho khoom loj uas koj xav muab pub rau lwm tus neeg koj siv tau qhov Internet khu xab nas txog qhov khoom ntawd los tau. Yog tias koj nyob hauv nroog loj no ces qhov website [www.twincitiesfreemarket.org](http://www.twincitiesfreemarket.org) yuav kam pab khu xab nas txog koj cov khoom qub. Kom pab cov pej xeeb uas xav muab tej khoom siv hauv tsev pub rau lwm tus neeg los sis nqa ntawm lwm tus neeg los, qhov FREEMarketSM yog ib qho kev pab txheeb xyuas cov khoom no. Tus neeg uas xav tau qhov khoom yuav tsum mus nqa. Qhov website no pab ua kom sawv daws cov khib nyiab tsawg zog vim lwm tus neeg rov qab siv tau tej khoom ntawd.



Thaum peb ua kom peb cov khib nyiab tsawg zog thiab rov qab siv tej yam khoom uas peb siv tau peb thiaj li tsis muaj khoom ntau pov tseg thiab thiaj li tsis ua rau peb tej chaw faus khib nyiab puv tuaj, thiab ua li no yuav ua rau peb cov pa huab cua thiab peb cov dej huv dua.



Kom tau tswv yim ntau dua hais txog txoj kev ua kom peb cov khib nyiab tsawg zog thiab txoj kev rov qab siv khoom (reuse) cia li txuas rau [www.GreenGuardian.com](http://www.GreenGuardian.com)

